



UNIVERSITÄTS-
BIBLIOTHEK
PADERBORN

Universitätsbibliothek Paderborn

Liber dissencionum archiepiscopi Coloniensis et Capituli Paderbornensis

Dietrich <von Engelsheim>

Münster, [1893-1897]

35. Epistola Monasteriensi, Hildensemensi, Mindensi... episcopis missa per capitulum supplicatoria, ut dominum Coloniensem induceret, ut ab incorporacione desisteret.

[urn:nbn:de:hbz:466:1-54427](https://nbn-resolving.org/urn:nbn:de:hbz:466:1-54427)

Copia cuiusdam litere scripte per capitulum ad episcopos Hildensemensem, Myndensem, Monasteriensem, Osnaburgensem et aliis principibus ect. ad dominum Coloniensem informandum, ut capitulum et ecclesiam Paderbornensem dimittat in libertatibus suis ect.

Den erwerdigen in Gode vadern unde hern, hern **35.**
 Magno to Hildenshem, hern Wulbrando to Minden, 1430
 hern Henrich to Monstere unde hern Johanne to Osna- 14. Dezbr.
 brugge, bisscopen, unde yren capitelen, den hogebornen
 fursten unde hern, hern Adolph to Gulike unde to dem
 Berge, hern Adolph to Cleve unde hern Arnolde to
 Gelre hertougen ect., den hogebornen unde edelen
 jonchern Roperte van Gulich unde van dem Berge,
 jonchern Gerard van Cleve unde van der Marke, hern
 Frederich, graven van Muerse unde hern to Bare,
 jonchern Johan unde jonchern Walraven, synen brodern,
 jonchern Otten, graven to Tekenenborch unde jonchern
 Corde, graven to dem Ryetberge, unde vorder allen
 fursten, geistlich unde wereltlich, graven, vryen hern,
 rittern, knechten, steden unde allen guden luden, dar
 desse brief an komet, unsen genedigen unde lieven hern
 jonchern unde gueden vrunden ontbiede wy domprovest,
 deken unde capitel to Paderborne unse gebet, denst
 unde groet na gebore unde gelegenheit.

Unde begern to weten, als gy eder iuwer eyndeils
 wal weten mogen, yn wat maten in vortyden de erwer-
 digeste in Gode vader unde her, her Diderich, ertze-
 bisschop to Colne to dem stichte to Paderborn komen
 is omme saken wille doe dem stichte an liggende unde
 up beterynge des stichtes, der doe gehapet wart van
 synen genaden to krigen. Soe is eme van pawess
 Johan, dem dryeundetwintichsten in deme namen, dat
 stichte in vormunderschap to bewaren to synen lyve
 bevolen na ynholde der bullen, darup to Fryborch

gegeven, unde mede verboden, des stichtes onbewegelike unde costlike bewegelike guede van der kercken nicht to vervremeden, noch in ander hande to bringen.

Darup he ontfangen, toegelaten unde gehalden is, dat stichte Paderborne mit allen rechten, tobehoringen unde upkomen gehat hevet eyn tyt van jarenn sonder unser eder yemandes des stichtes ondersaten hinder; dar eme denst unde wille van geschien is to velen tyden, eynsdeils vorder,¹⁾ dan synen vorvaren.

In alsulker vormundeschap unde bevele heft unse here eynsdeils des stichtes slote, guede unde renten in unwontliker maten versat, verscreven unde verpendet mit gelaveden weder to nemen,²⁾ de nicht weren vor dat sticht Paderborne. Des wy noch nicht scriven willen, dar wy mit eme wat van hebben reden laten, doch des mere verswegen, — omme syne genade to beholden unde syne ongenade to verhoden — dan nutte is, alse wy nu bevinden. Hevet ouch des stichtes volschuldige, egene lude gevryet, manleen, ledige guede, de eme ledich geantwort unde yn komen syn, verleynt unde vergeven denyenen, de dar neyne rechte volger to wern, — nicht to nutte des stichtes. — Vele des stichtes rechte unde guder gewonheit in syner tyt overgegeven unde vergaen laten; drepelike summen gulden, in dem stichte van Paderborn upgekomen, to sich genomen, in syn unde syns stichtes Colne nutte voren³⁾ laten, dar van gescheiden⁴⁾ waz, dat de solden bleven hebben in nutte syns unde des stichtes Paderborne. Dat alle geschien is sonder unse wetenschap, willen unde vulbort: Dat soe bilke nicht syn solde.

Unde woe wal unsem hern alsus⁵⁾ denstes willen verswinge geschien is van uns unde synen ondersaten

¹⁾ mehr. ²⁾ mit Zusicherungen, solche wieder anzunehmen. ³⁾ verwenden. ⁴⁾ abgemacht war. ⁵⁾ sonst.

des stichtes van Paderborne unde liefliken gehalten unde togelaten is, des en hevet eme nicht genoch gedocht, he en hebbe darna gestanden unde hebbe sich unde synen stichte van Colne [van] unsem heiligesten vater, dem pawese in dessem jare dat stichte van Paderborne geven, incorporeren unde eigenen laten, by dem stichte van Colne to ewigen tyden to bliven weder unsen unde der unser wille unde sonder noet unde behoven beyder gestichte vorgescreven; darmede dat sticht van Paderborn, wy unde alle ondersaten des stichtes vorgescreven vornedert, ontfryet unde veromechtet werden to ewigen tyden.

Darup hevet unse her to uns gesant syne rade unde vrunde, an uns bringen unde gesynnen laten, dat to beleven unde to tolaten; hevet sich vorder daran bewyset mit mannen, steden unde ondersaten, des sich also¹⁾ an ene unde an dat sticht van Colne to gheven; andere fursten, graven, vryen hern, rittere unde knechte, by dem stichte beseten, gebeden unde besocht,²⁾ by eme to bliven, de sake tegen uns na synen willen to vordern, dar³⁾ uns van den eynsdeils omme syne⁴⁾ wille scryft van komen is, des wy all iu nicht scriven en können.

Unde want wy meynen, unse her sole des mogelich⁴⁾ nicht gedan hebn unde uns des tegen⁵⁾ eyenen andern wederstaen helpen hebn na syner gelegenheit unde geloven, dar he up dat sticht underhevet, soe hebbe wy vele gebeden unde bidden laten mit sryften unde worden, des stichtes ondersaten gebeden, unsen hern to bidden, de sake aftoslan unde to begeven omme Gades, unser patronen, syner gelegenheit unde bede wille, dat stichte to beholden⁶⁾ unde na eme to laten,

¹⁾ sich so nun. ²⁾ ersucht. ³⁾ worüber. ⁴⁾ billiger Weise. ⁵⁾ im Gegentheil. ⁶⁾ erhalten.

alse syne vorvaren gedan hedden van tyden des heiligen koninck Karls van Frankryke, Romeschen keyzers, de dat sticht fundyert hedde mere dan vur seshondert jaren, eer dan dat an ene gekomen were. Dar wy noch anders keyn antwort af hebn: dan uns duncket, he wolde gerne syne angehaven sake enden. Unde want wy noch nicht en gheren¹⁾ dan genaden unsses hern unde den vur unsen hern gerne to holden up alsulke vormunderschap unde bevele vorgescreven syne levedage lange, mochte wy unveromecht unde unvornedert [bliven.]²⁾

Soe hebbe wy gesant an brodere unsses heren van Colne, unse gnedigen hern unde jonchern, de vleliken bidden laten, vur uns to bidden, uns genade unsses hern to erwerven, der wy wal behoven unde alle tyde soken: want se unde gy alle unde besondern unser to rechte to allen redeliken denste unde willen mechtich syn solden, soe sich under eme unde uns gebort. De uns darup hebn gutlike antworden laten, unse bidden to yrem broder, unsem hern, to werven. Des is uns sere behoef unde noet, dat wy antwort mochten krigen van unsem heren, dat dat sticht van Paderborn, wy unde des stichtes ondersaten, mochten by alden rechten, vryheiden unde gewonheiden blyven.

So bidde wy iu alle unde besondern, lieve gnedigen hern unde jonchern unde gueden vrunde, vur uns to bidden, of gy konnen uns genade erwerven uns hern van Colne, dat sticht van Paderborn to behalden unde to laten, alse vorgescreven is, uns daromme nicht ungenedich to wesen, dat wy dat sticht nicht overgeven, dat wy gelavet unde gesworen hebn, na unser macht to beholden unde verwaren unvrevremet. Off wy alsulker

¹⁾ Und wie wir ferner nur begehren. ²⁾ ergänzt.

beden nicht mochten genyeten, alse wy nicht hopen, soe verdervet uns unsers hern ungenade, des wy besorget syn na syner bewysinge unde syner vrunde scryft an uns gekomen, dat uns to swair is unde undrechlich werden mochte, want wy grote cost, hoede¹⁾ des unses unde arbeit gedan hebben unde besorgen, noch don moten.

Wy hebbe omme gelegenheit vorgeschreven, vernedering unde besweringe, de dem stichte unde uns geschege mit der beholdingen vorgeschreven, appellirt an unsen geistliken vader, den pawez, in den hoff van Rome unde uns unde de unse gegeven under beschermynge des stoels van Rome, unse recht aldar to vordern, dat doch uns tegen macht, rikedage²⁾ unsses hern unde denst der syner vele to swair is unde ongelike leget. Mochte uns anders keyn genade wedervaren eder erworven werden, dat wy doch mochten, de wyle de sake aldar henge, ungenaden unde schaden vor unsem hern, den synen unde omme syner wille uns to geschien unbesorget unde verlaten blyven; meynen dat eme dat to dem mynsten wal geborde. Unde off wy up dat alle vorgeschreven keyn antwort krigen, alse wy nicht en hopen, unde ommer in alsulken anxe, cost unde arbeyde sitten solden, soe wilt doch to synne nemen, in wat maten unde woe uns dat wederfert van unsem hern in vormunderschap unde gantzen geloven, darup wy eme des stichtes stede unde slote undergeantwort hebben, des stichtes van Paderborne recht, vryheit unde gewonheit mede to verdedingen unde to beholden, unde nicht daromme, darvan unde darmede dat sticht to ontfryen unde to vernedern. Want to merken is, hedde unse her der nicht ynne gehadt unde noch ynne, en

¹⁾ Behütung, ²⁾ Reichthum.

hedde nu he gerne ander recht an dem stichte, dan¹⁾ dar he de²⁾ up ontfangen heft, soe en were wy unde andere ondersaten des stichtes soe sere nicht vor syner ongenade besorget, also wy nu syn moten. Unde of³⁾ wy dan vorder screven, clageden unde darna dechten, of wy yemande krigen konden eder kregen, den omme Gades willen gewolt unde unrecht, also uns geschien is unde geschuet, leit were eder worde, unde uns verbidden unde beschermen wolde unde des beschermede unde uphelde, soe wilt doch unser vleliken anropingen, vlehens unde biddens andechtich syn unde bedenken, wat noetsake uns dringet, der wy doch noch gerne ommeganck hedden,⁴⁾ mochte wye yemands daranne genyeten.⁵⁾

Genedigen, leven hern jonchern unde gude vrunde! Omme dat loen van Gade, waldait unser patronen, rechtes unde beden wille en wilt uch unser scryft to horen nicht verdryeten laten, sonder noch⁶⁾ vor uns bidden unde to unsem rechten uns genedich, gunstlich unde vruntlich syn! Dat wille wy tegen Got unde unse patronen verbeden⁷⁾ unde williclich gerne verdienen.

We desses breves utscryft wille, de mach se nemen unde verdige unsen bden vortan.⁸⁾ Datum anno Domini MCCCCXXX^o., crastino beate Lucie virginis.

Hirna volget antwort unssers hern van Colue up clage, also wy domprovest, deken unde capitel van Paderborn gedaen hebben, hir neist vorgescreven, de uns up unse clage nicht dunckt antworden.

T(heodericus), archiepiscopus Coloniensis, Westphalie et Angarie dux, dominus et administrator ecclesie Paderbornensis.

¹⁾ als. ²⁾ nämlich die Stiftsstädte und Schlösser. ³⁾ wann. ⁴⁾ umgehen, vermeiden. ⁵⁾ Jemandes Beistand darin genießen. ⁶⁾ jetzt. ⁷⁾ dafür beten? ⁸⁾ weiter.